

**DE EXISTENTIA ET
PERFECTIONIBUS D.
O. M. DISSERTATIO,
QUAM IN COLLEGIO
NOBILIUM REGIO...**

Paolo Premoli





DE EXISTENTIA
ET
PERFECTIONIBUS
D. O. M.
DISSERTATIO,
QUAM

IN COLLEGIO NOBILIUM
REGIO IMPERATORIO LONGONO

Sub directione

CLERICORUM REGULARIUM

Congregationis D. PAULLI

Una cum aliis

LOGICO-METAPHYSICIS CONCLUSIONIBUS

COMES PAULLUS PREMOLI

CREMENSIS

Publico Examini More Academico exponebat.

** ~ ~ **

MEDIOLANI)(MDCCLIV.

Apud Federicum Agnellum.
Superiorum permissu.

THE UNIVERSITY OF CHICAGO

LIBRARY

1000

1000

1000

1000

1000

1000

1000

1000

1000

1000

1000


1000

1000

1000

1000

1000



DISSERTATIO.



Studiorum nostrorum rationem aliquam primo inclinante Philosophici curriculum anno, & jam fere Logicis, & Metaphysicis institutionibus absolutis, pro muneris nostri parte, & consuetudine reddituri, illud ex universa Logico-Metaphysica, in quo pertractando fusius, atque expressius versaremur, præ aliis omnibus, caput selegimus, quod de existentia, & perfectionibus Dei Optimi, & Maximi inscribitur. Gravissimum procul dubio argu-

mentum , & in quo immorari Philosophum ætate hac nostra potissimum , atque his temporibus deceat , in quibus non sine magna veritatis , & morum labe cavillatiunculas nescio quas circa Dei providentiam , spiritualitatem , libertatemque profeminant captiosi homines , qui vere Athei quum non sint , cœca , & nefaria irreligionis ostentandæ ducti libidine Athei videri volunt : Neque enim apud Mahumedanos solummodo , qui Muserini (a) appellantur , & in Jappone , atque in Sinis (b) hæreseos illius affectæ , quam Foekiao dicunt , sed in nostræ etiam Europæ sinu Materialitæ , ens illud primum , & summum , quo aliud melius nec esse , nec etiam percipi a nobis potest , cum extensione , & corporibus , creatorum entium vilissimis , promiscere , & confundere ausi sunt . At quæ in meridie clarissimo , & lucidissimo tenebræ offundi

po-

(a) Ricaut de l'Emp. Ottom. liv. 2. chap. 12.
 (b) Bernierius de rebus indicis p. 202. , & sequ. edit.
 Batava Bibl. Univ. to. 7. p. 403. , 404. Acta Erud. Lips.
 an. 1682. , p. 258.

poterunt? Quorsum minusculæ Bælii, Spinozæ, Tolandi, Hobbessii, Cowardi, Cuentzii, & aliorum ejusdem furfuris teterrimorum hominum gerræ? Plane is fungum pro capite habeat oportet, qui ad pulcherrimam, ordinatissimamque hanc rerum materialium compagem sese convertens ictu oculi citius non assurgat, & manu quasi ducatur ad cognitionem principii illius longe materia nobilioris, perfectiorisque, æterni, omniscii, liberi, providentissimi, quod Deus dicitur.

Consensit hacce in re veterum Philosophorum non melior tantum, sed potior etiam pars: Anaxagoram enim, Protagoram, Diodorum, Evehemerum, aliosque non alia ratione Atheos vocatos a Græcis fuisse contendit Clemens Alexandrinus, quam quia dumtaxat unicum supremum Deum venerantes popularia numina aspernarentur. Consentiunt recentiores paucissimis, iisque iidem perditissimis oretenus reclamantibus, quorum numerum imperite nimis augere accersitò Atheis Leone Decimo Pontifice

Maximo Petrus Bælius (a) conatus est : Imprudentissimam enim simul , impudentissimamque hanc fuisse Heterodoxorum quorundam calumniam , Lutheri (b) , Seckendorffii (c) , & Heideggeri (d) , qui Leonem umquam nec viderant , nec agnoverant , ipse etiam Bælius non diffitetur in suo Dictionario Historico , notis ad Leonis titulum additis , ubi apertissime se retractat . Consentunt denique mirum in modum omnes cujuscumque indolis , & regionis populi , cultissimi æque , & incultiores , ac prorsus barbari : Si quæ enim nationes videri possunt nullam supremæ , & necessariæ causæ notitiam præferre , eæ nec tot sunt , quot ab aliis fuit jactitatum , & quum bardæ prorsus , ac stupidæ cogitandi vim omnem pravæ educationis vitio prope amiserint , potius ad connexionem
crea-

(a) *Cont. de pens. div. sur la Comete, ou reponse &c.*
 § 18.
 (b) *Comment. in cap. 19. Gen. v. 13. fol. 132.*
 (c) *Hist. Luth. lib. 3. p. 676. col. 1.*
 (d) *Hist. Papat. p. 272., 273.*

creatarum rerum cum Deo minime attendere , quam inficiari Deum censendæ sunt .

Et plane in integro continenti nostro , quod Asia , Africa , & Europa complectitur , quodque ex Septentrionali etiam freu Kamschatka , & Siberiæ parte Oceano allui Russorum observationibus compertum est , nullæ gentes hujusmodi deprehenduntur , & mirari subit Joannem Lockium (a) hominem certe ingeniosum , nec ineruditum Louberii (b) autoritate Siamenses Atheis recensuisse , quos a Sinensibus religionem habuisse acceptam , & religionis vestigia habere undique itinerariis omnibus , & itineratoribus docemur . Cafros , & Hottentotos Promontorii bonæ spei incolas , quos primi viatores religionis extorres esse evulgaverant , supremam causam agnoscere longiori hominum illorum societate , &

a 4

do-

(a) *Essai sur l'ent. bum. liv. 1. chap. 3. §. 8.*

(b) *Du Roy. de Siam. to. 1. par. 2 chap. 9 sect. 15., & par. 3. chap. 20. sect. 4 , & chap. 20. sect. 22.*

domicilio didicit Andreas Kolbi (a). Duo ipsi principia, & Deos admittunt bonum, & beneficum unum, quem Gounya Ticquoal apellant, & malum alterum, quem dicunt Touquana: Quumque illum primum, utpote per se bonum cultu aliquo sibi propitium reddere supervacaneum esse existiment, malum sibi quam fieri potest benemereri externis honoribus curant maxime. Vide de his Lambertum tomo decimotertio Historiæ universalis capite primo. Circa alios interioris Africæ populos, qui noti sunt, reliquosque Asiæ, & Europæ incolas, Tartaros etiam, Samojedas, & Lappones ne ullum quidem apud itineratores omnes est dubium. Valet id ipsum de insulis continenti eisdem nostro adjacentibus, ubi Marianas, & Carolinas tantum excipias. In iis enim, quam primum detectæ sunt nec idola, nec templa, nec sacerdotes, nec alia quæpiam religionis vestigia inventa sunt.

Quod si ad alteram continentem terram,

(a) Kolbi *descrip. capitis bonæ spei.*

ram , quæ Americæ a Vespuccio nomen
obtinuit nos conferentes in Meridionali
ipsius parte figamus oculos , ubicumque
notitiam Dei , cultumque aliquem ob-
tinereprehendemus . Excipit Lam-
bertus Provinciam Chiquitarum , & po-
pulos , quos Chiriguanes , & Marocotas
vocitant . De Paraguariis hæc habet ver-
ba Nicolaus del Techo in triplici relatio-
ne de rebus indicis Caaiguarum . *Reperi-
eam gentem nullum nomen habere , quod
Deum , & hominis animam significet , nul-
la sacra habet , nulla idola .* At ex quo
natio aliqua proprium vocabulum mini-
me habeat , quo Deum exprimat , minus
recte videtur colligi , divinitatis notitiam
omnino nullam illi affulgere . Plane ali-
quam Dei notitiam Virginiae populos ha-
bere ex itineratoribus omnibus , ut infe-
rius attingemus , constat : Apud eos ta-
men nullum vocabulum , quod apte Deum
exprimeret , inventum esse , constat ex
Virginiana Bibliæ sacræ versione , quam
anno 1663. characteribus nostris Canta-
brigiae edidit Joannes Eliot , & in qua ,

cæteris omnibus Americane redditis, *Dei* nomini ubique respondet hoc nomen *God*, quod Anglice Deum significat. Primus versiculus ex. gr., *in principio creavit Deus cælum, & terram &c.*, sic vertitur: *Weske Kutchissik ayum God Kesk Kab Okke, &c.* Bibliæ titulus est, *Mamusse Wunneetupanatamwe Up-Biblum God Naneiswe Nukkone testament Kan Wonk Wusku testament*, & exemplar ejus habetur in amplissima Bibliotheca Comitis Caroli Pertulati, viri æquitate, eruditione, sapientia, celeberrimi, & de litteraria simul, ac civili Republica optime meriti.

Sed modo e diverticulo in viam. In eundem Atheorum censum sylvestres Brasilienses collocat, capite decimo sexto, Dominus De Lery: Sed, ut observat Martinierius, minus recte. En verba ipsa Martinierii. *Mais on ne peut pas dire qu' ils n' ont absolument point d' idée de la Divinité; car ils levent souvent leurs mains vers le Soleil, & la Lune en signe d' admiration, & s' écriant a plusieurs re-*
pri-

*prises Teh Teh . C'est comme s'ils disoient
voilà qui est admirable .* Cæteri omnes divinitatis notionem aliquam , & cultum habent . Amazonii sua habent idola . Manacicæ tres Deos colunt , quos vocant communi nomine Tinimaacas , & alios insuper Deos minores . Moxi , ut ut nulla futuræ vitæ spe gaudeant , Soli , Lunæ , & Syderibus honorem exhibent . Chilenes & ipsi Dæmonem venerantur , quem Eponamon , sive omnipotentem appellant , quemque ante gerenda bella , & res alias graviores consulunt . Peruviani antequam sub Incarum dominio viverent innumerabiles Deos adorabant , herbas , plantas , animalia , metalla , montes , specus &c. Peculiares Provinciæ , Urbes , familiæ , peculiares etiam habebant Deos . Mango Capac , summus ille Imperii hujus legislator , quum Solis filium seise dixisset , Solem supremum Deum esse docuit . Id apud alios novæ Granatæ populos , apud Cumanenses , Panamenses &c. obtinuit : Quamvis egregie adnotet Lambertus rudioris dumtaxat vulgi hunc cul-

cultum esse , aliis omnibus perspicacioris ingenii hominibus primum materiæ motorem aliquem , & mundi animam agnoscantibus .

Ad Americæ Septentrionalem partem quod attinet , Mexicani supremum Deum adorabant , cœli , & terræ creatorem , rerumque omnium supremum Dominum , cui Vitzliputzli nomen dabant , & alios genios mundi administratores . Confusissimas Divinitatis notiones habent Canadenses : Nihilominus Solem creatorem veluti , & conservatorem summum venerantur . Missipenses & ipsi habent tutelares Deos , quibus in suis saltationibus honorem præstant . Qui ad dexteram fluminis Sancti Laurentii partem manent sylvestres homines, Natches dicti, specialem cultum Soli quum dent , plura alia habent idola . Virginienfes præter Solem colunt etiam aliud idolum , Kivasa nomine , quod consulunt , & cui templum , sacerdotes , & festa , ac ceremonias instituunt . Solis , & Lunæ cultus Floridentibus , Garibis , aliisque adjacentibus

tium insularum populis est communis :
 Quid plura ? Ubi minores quaslibet amplissimæ hujus regionis insulas , & provincias contemplemur , videbimus cognitionem Dei optimi , & maximi longe , lateque affulgere , nec nisi apud populos quosdam efferaiores barbaris moribus verius depravatam , quam prorsus deletam esse .

Quare quum perpaucorum feritas , & ignorantia cæterorum hominum iudicio officere nequaquam possit , nec res ex furiosorum sententia , sed meliorum , & plurium sensu sint judicandæ , locum adhuc , & vim habebit argumentum illud , quod ad probandam Dei existentiam ex universali ætatum omnium , & omnium gentium consensu derivarunt , ex veteribus Plato , Aristoteles , Tullius , Seneca , & Plutarcus , ex recentioribus vero Cudworthus (a) Benoeftius (b) , & Genuensis (c) . Quod licet argumentum enervare

(a) *System. Intellect. cap. 4.*

(b) *In præf. libri adversus Tolandum .*

(c) *In schol., & append. in cap. 1. lib. 3. Elem. Metaph.*

re plurimi , & in primis Bælius conatus sit , jure merito adhuc gravissimum , & invictissimum potest censerī . Nam , ut ait optime , & eleganter (a) de more suo Genuensis , seu dicamus ex uno communi fonte eam doctrinam derivatam esse , idest a primo quodam generis humini parente , & propagatore , & est argumentum certissimum cœpisse aliquando homines , ac proinde originem hunc mundum habere , quod esse nequit nisi a potentissima aliqua , & intelligentissima causa . Seu dicamus depromptam esse ex aspectu mundi , & argumentum idem est perspicuum Deum esse ; Quod enim clare , & evidenter omnibus videtur non potest non esse verum . Quoniam ergo tam longe , lateque diffusæ consensionis æque patens causa sit , necesse est ; nec alia esse possit præter eas , quas recensuimus ; earum vero altera posita , Deum esse necessario conficitur ; Deum ergo esse perspicuum est .

Hæc vero obiter tantum dicta , & notata sint . Nobis in præsentiarum non fuit

(a) In. append. eadem § 2.

fuit propositum argumentis illius generis Atheos perstringere, sed solum argumentum aliud urgere, & etiam, si fieri posset ad absolutæ, legitimæque demonstrationis vim restituere, quod jam olim ex inertia, & otiositate materiæ delumptum est: Non quod reliqua omnia minoris ponderis esse arbitremur, sed quod ægre admodum feramus momentum illud a corporum essentia, & natura erutum passim negligi. Relinquimus igitur in suo robore alias demonstrationes, tum Metaphysicas, quas ex conceptu contingentium rerum depromptas copiose adeo exhibuerunt Cudworthus, Clarkius, Fencionus, Genuensis, Wolfius, & Soria, tum Philologicas, quas ex historia humana protulit Jacquelotus, tum etiam Physicas, quas Derhamus, Niewentitius, & Newtonus superstruxerunt ordini, perfectioni, & structuræ Universi hujus, atque insuper Mathematicam, quam in suis Cosmologiæ elementis Maupertuisius ex quadam motuum œconomia, & generali, ut putat, minimæ actionis lege derivavit.

vavit . Contendemus dumtaxat corpora ex propria essentia esse inertia, & agendi principio quolibet destituta, ac proinde nec esse a se, nec moveri potuisse umquam, nec motum, atque existentiam suam aliunde habere acceptam, quam ex causa aliqua necessaria, independenti, & perfectissima .

Hoc argumentum quod invictissimum, & æque certum videri poterat, ac explorata omnibus sit materiæ otiositas, & inertia infirmari a Cl. Lockio cœpit : Quum enim in pervulgato suo de intellectu humano tentamine dictitasset passim essentiam rerum, & corporum esse incompertam, & dubitasset propterea utrum cogitandi vis, & facultas convenire materiæ posset, dubium etiam, incertumque voluit relinquere utrum ipsi aliæ vires, facultates, motusque ex propria essentia convenirent . Lockio accesserunt plures naturam corporum perspicere, & cognosci minime a nobis posse ex eo confirmantes, quod cum acerrime per tot sæcula disputatum sit a Philosophicis de essentia cor-

porum , non ideo tamen componi lites , & definiri hactenus eadem potuit . Hinc factum est ut materiam , & corpus ipsi fere Chiliogonum esse dicerent , cujus dumtaxat quatuor , aut quinque latera innotescerent , ignotis reliquis , quaternæ scilicet , aut quinæ tantum proprietates .

Accesserunt his etiam alii ex Physicorum classe activitatem materiæ , & corporum derivantes ex quo in systemate hoc nostro , quam late patet , absolute quietens corpus sit nullum . Plane ex Astronomicis observationibus Sol circa suum centrum movetur , & circa Solem moventur pariter Cometæ , & Planetæ omnes . Universalis ea vis quæ gravitas appellatur , motuum horum omnium , & aliorum etiam complurium , maxime circa telluris superficiem , causa est . Præter gravitatem hanc vires aliæ minimas corporum particulas in minimis a se invicem distantis agitant , & ad accessum , aut ad recessum determinant . Prostant innumera hacce in re Newtoni , Keillii , Musschenbroekii , aliorumque sexcento-

rum fere experimenta . Non pauca iisdem addidit plane nova, & singularia investigator naturæ optimus Thomas Needham . In pluribus ipse infusioribus fluidorum , ut succi amygdalarum &c. aliquot post infusionem diebus , præ tantissimi Microscopii ope , deprehendit crassiores qualdam , & fixas infundo vasis particulas accumulari , tum reliquam portionem fluidi in filamenta fere innumera dividi , inter se invicem sub quibuscumque angulis , & omnifariam posita , ex quorum filamentorum capitibus plures , & plures successive globuli emergebant , ut tota demum in globulos converterentur . Globuli varios , irregularesque motus ex ipsa sui formatione habebant: Tum vero globulus quilibet in duos dividebatur , & ex his ambo adhuc in duos , & duos rursus , quoadusque demum Microscopio , in cujus foco positis fluidis distincte omnia contemplantur , eriperentur ob parvitatem . Et ne suspicio exinde esset quod dicti motus a causa aliqua extrinseca orientur , ab attractione aeris

ex.

ex. gr., aut circumstantium particularum, fluidi guttam unam a reliquis separatam alteri fluido immerſit, deprehenditque ne minimum quidem, mutato ambiente corpore, guttæ motum variari. Experimenta hujusmodi plurima verſus finem anni 1751. ſimul cœpimus, atque ipſe fuſius expoſuit in ſuis *Nouvelles obſervations Microſcopiques*.

At meo quidem judicio aliud eſt ſucci amygdalarum particulas ſingularibus iſdem motibus abreptas eſſe, quod a Needhamo fuit obſervatum, aliud quod motus ipſi non ab extrinſeca cauſa aliqua, ſed ab innato, & eſſentiali principio motus profluxerint, quod neque author ingenuus, & ingenioſus umquam aſſeruit, neque ſupponi idcirco deberet umquam, quod motuum cauſa incomperta eſſet. In tenuiſſima quæpiam animalcula aeri, fluidiſque aliis innatantia, regeri rem omnem poſſe ſuſpicatus eſt nuperus Aubentonii, Buffonii, & Needhami Criticus (a). En ejus verba. *Com-*

ment auroit-il pu s'assurer qu'il n'y avoit point d'animaux répandus dans l'air que contenoient les bouteilles , ou dans les germes d'amandes ? Leeuwenboeck en a bien observé , ou l'on ne se seroit jamais imaginé qu'il y en eût . Qui lui a dit que ces animalcules étoient des particules d'amandes ? Et dans le cas où il s'en seroit assuré , qui lui a dit encore que des animaux imperceptibles , même à l'oeil aidé du microscope , ne s'étoient pas emparé des débris des germes d'amande , & qu'il n'étoient pas la vraie cause des mouvemens qu'on y appercevoit ? Sed de vera horum motuum causa quidpiam decernere nostra non interest . Proponemus conjecturas aliquot capite ultimo libri primi nostrorum Physico-Mathematicæ elementorum , si quando ad calcem ipsa , & in publicam lucem venient . Interim duo explorata nobis , & rata sunt : Eos minimarum particularum motus non profluxisse ab intrinseco principio aliquo , & corpora ex sui natura , & essentia prorsus inertia , & otiosa esse .

Quod ut pro viribus , & quantum in
Metaphysica re potest fieri , demonstre-
mus , exinde ordiemur omnem demon-
strationem , unde ea dubia Lockio subor-
ta sunt . Incompletas , imperfectasque
corporum ideas nos habere asseruit Lo-
ckius , nec nos negamus , qui licet per
extensionem solidam , tamquam per ge-
nus , & differentiam definiri corpus arbi-
traremur , non ideo tamen diffiteremur
soliditatis , & extensionis , aliarumque
omnium relationum utriusque imperfe-
ctas ideas in nobis esse . Ut unum saltem
ex tot iis locis , in quibus Lockius id ip-
sum repetit , proferamus , videatur lib. 4.
cap. 3. §. 26. , ubi hæc leguntur : *Nous
n'avons que des idées fort imparfaites , &
incomplètes des Corps* . Porro dum in-
completas , imperfectissimasque corpo-
rum ideas nos habere putavit Lockius ,
putavit etiam nos habere ideam aliquam ,
imaginem scilicet , aut repræsentationem
eorundem corporum menti exhibitam .
Qui omnino nullam corporum ideam esse
in nobis pertinacius defenderet , is pari

passu negare posset corpora esse , & moveri , & fuste verius , ac baculo sanandus esset , quam argumentis Philosophicis revincendus . His positis illud omnibus ex sensu intimo , & ex conscientia exploratum , notumque est in eadem corporum idea , quæcumque sit (neque enim opus est nobis in præsentiarum eam ideam singillatim explicare , & perpendere) notionem ullam vis facultatis , potentiæque agendi cujuslibet non comprehendendi . Alterum etiam nobis videtur certum , quod scilicet si vis ulla , aut potentia agendi quælibet ad essentiam corporum pertineret , deberet aliquo saltem modo exhiberi , & comprehendendi in idea corporum . Corpus concipere sine aliqua essentiali ipsius proprietate idem est nobis ac corpus concipere sine corpore . An non enim , quæ essentielles sunt proprietates , immediate , & intrinsece corpus constituunt ? Sed hæc paullo distinctius , & generalius sunt exponenda . Agamus igitur .

Definitio Prima .

Essentia est forma intrinseca rei cujuspiam , qua talis potius eadem res constituitur , quam non .

Definitio Secunda .

Essentiales rei proprietates sunt quæ immediate ipsius essentiam constituent .

Definitio Tertia .

Accidentales vero dicuntur proprietates illæ , quæ salva essentia rei possunt esse , & abesse .

Definitio Quarta .

Necessarium vocatur id , quod non esse nequaquam potest . Possibile id , quod cum possit non esse , non tamen implicat quod sit : Impossibile demum id , quod esse implicat .

Definitio Quinta .

Perfectum dicitur id , quod est , & perfectius id , quod est magis , majorem scilicet proprietatum numerum , extensionemque in se complectitur : Ita qui ex anima , & corpore est compositus ex. gr. , perfectus homo , & qui ulterius est fortis, prudens, sapiens &c. homo perfectior appellatur .

Axioma Primum .

Nihil est sine ratione sufficiente cur potius sit , quam non sit .

Axioma Secundum .

Quod est , neque in se ipso sufficientem rationem habet , cur potius sit quam non sit , necessario rationem eandem in alio aliquo extra se habet .

Axioma Tertium :

Quod extra se , & in alio minime habet sufficientem illam rationem, necessario in se ipso habet .

Postulatum .

HAbemus aliquam ideam corporis, quomodocumque demum perfecta, aut imperfecta, adæquata, aut inadæquata eadem sit.

PROPOSITIO PRIMA.

SI in toto rerum quarumdam genere, non reperiatur sufficiens ratio, cur sint res ipsæ, necessario admittendum erit aliud aliquod rerum genus.

Demonstratio .

CUjuscumque generis sint res propositæ, necessario, vi primi axiomatis, habere debent sufficientem rationem aliquam, cur potius sint, quam non sint. Sed per hypothesein hanc rationem in se non habent. Ipsam igitur, per secundum axioma, extra se habent, & in alio aliquo alterius diversi generis.

Corollarium .

ITa , si corpora omnia in se non habeant propriæ existentiaë , propriique motus rationem , aliud incorporearum rerum genus existat necesse est .

PROPOSITIO SECUNDA .

SI plures simul eidem rei proprietates sint essentielles , sine aliqua singularum essentialium proprietatum idea res concipi , neque perfecte , neque imperfecte poterit .

Demonstratio .

Proprietates cujuscumque rei essentielles , ex secunda definitione , sunt , quæ constituunt immediate essentiam rei . Rei igitur immediate , & necessario conjunctæ sunt . Sed quæ immediate , & necessario eidem tertio junguntur , junguntur etiam eodem modo inter se : Inter se igitur immediate , & necessario conjunguntur in eadem re essentielles rei proprietates , atque adeo etiam in idea

rei conjungentur , quum idea nihil sit aliud quam rei imago . Porro , si quæ immediate , & necessario conjuncta inter se sunt , eorum unum auferri nequaquam potest nisi aliis simul ablati . Neque ergo potest ex idea rei demi , & auferri aliqua essentialis ipsius proprietates nisi omnis idea rei auferatur , & nulla amplius , aut perfecta , aut imperfecta superstes sit .

Corollarium Primum .

IN generali theoremate peculiaris quique casus complectitur . Ex. gr. tres proprietates ad circuli essentiam simul pertinent : Quod sit primo figura plana : Secundo quod lineæ unius circuitu comprehendatur : Tertio quod rectæ omnes ab aliquo interno puncto ad illam ductæ æquales sint . Quare ab una , vel altera ex his proprietatibus per mentem abstraendo , præscindendoque , neque perfecta , neque imperfecta amplius , sed prorsus nulla idea circuli supererit .

Corollarium Secundum .

CONTRA si rei cuiuspiam ideam aliquam nos habeamus , quæ peculiaris proprietatis ideam non involvat , argumento erit proprietatem eandem ad rei essentiam non pertinere . Sic quoniam idea trianguli ex se præscindit ab idea æqualitatis laterum , & angulorum , essentiale triangulo esse non poterit , quod sibi æqualia , vel inæqualia sint latera , & anguli .

PROPOSITIO TERTIA .

CORPORA ex sui natura prorsus inertia , & otiosa sunt .

Demonstratio .

IDEAM aliquam corporum nos habere in postulato antecedenti fuit dictum . In hac ipsa idea , quæcumque sit , nullam virium , facultatum , & potentiarum agendi ideam necessario involvi ex conscientia , & ex intimo sensu liquet . Habemus ergo ideam aliquam corporum sine aliqua

qua activi principii idea . Sed per secundam propositionem ubi vis aliqua , aut potentia essentialis esset corporibus ; nulla idea corporum haberi a nobis , sine idea vis , & potentiæ ejusdem posset . Non ergo esse potest corporibus essentialis vis eadem , seu , quod eodem recidit , corpora ex sui natura prorsus inertia , & otiosa sunt .

Corollarium Primum .

Actiones omnes & vires , quæ in corporibusprehenduntur , attractio gravitas &c. corporibus accidentales sunt , & extrinsecæ .

Corollarium Secundum .

Proprietates accidentales esse , & abesse , manente essentia rei alicujus possunt . Non ergo in re ipla potest esse ratio cur sint . Ergo neque in corporibus esse potest sufficiens , ratio omnium peculiarium virium , & actionum .

PROPOSITIO QUARTA .

Sufficiens ratio cur sint , & moveantur corpora esse in corporibus non potest .

Demonstratio .

Moveri , & esse a se non potest illud , quod nullam in se habet vim . At per propositionem tertiam otiosa prorsus , atque inertia sunt corpora , & ex sui natura expoliata quacumque vi , facultate , & potentia agendi . Non possunt ergo esse , & moveri a se , sibi que ratio , & causa esse cur sint , & moveantur .

Corollarium .

Multo minus poterunt corpora incorporeæ alterius rei causa esse .

PROPOSITIO QUINTA .

Sufficiens ratio cur sint , & moveantur corpora ex alio rerum genere debet repeti .

Demonstratio :

EX propositione quinta antecedenti corpora in se non habent rationem aliquam sufficientem cur sint, & moveantur . Ergo per corollarium propositionis primæ hanc rationem in alio aliquo rerum genere habere debent .

Corollarium .

QUod non est corpus , & tamen est , incorporeum , & spirituale esse debet . Aliud itaque spiritualium rerum genus est admittendum .

PROPOSITIO SEXTA .

Spiritualium hujusmodi rerum genus in se complecti necessario debet rationem propriæ existentiae .

Demonstratio :

SI non : Per axioma tertium habebit rationem suæ existentiae extra se ; seu , quia extra incorporearum , & spiritualium rerum genus dumtaxat corporeæ

remanent , in corporibus erit ratio existentiae spiritualium earundem rerum . Id vero per Corollarium propositionis quartae absurdum est .

Corollarium .

ITa in eodem genere ratio existentiae spiritualium æque , & corporearum rerum , omnium scilicet debet esse .

PROPOSITIO SEPTIMA.

EX rerum earundem genere res aliqua est a se .

Demonstratio .

AUt aliqua a se est , aut singulae ab alia sunt . At si ab alia sunt singulae , omnes etiam simul acceptae , idest totum spiritualium rerum genus extra se habet existentiae propriae rationem , contra propositionem sextam . Aliqua ergo necessario est a se .

Corollarium Primum :

EXistit ergo res aliqua independens prorsus , necessaria , & a se .

Corollarium Secundum .

ALia res omnes spirituales , & corporeæ , quæ sunt , ab hac re habent , ut sint .

Corollarium Tertium .

ET ita pariter quia res præteritæ , aut futuræ , & possibiles ex se non habent suam existentiam , suppositione facta quod sint , existentiam habere debent ab aliquo , quod vere sit , sive ab eo , in quo omnia , quæcumque sunt , sufficientem suæ existentia rationem habent .

PROPOSITIO OCTATA .

EXistit Deus .

Demonstratio .

DEus est ens necessarium , & independens , quod est a se , & in quo est ratio existentiae aliarum omnium rerum , quæ sunt , aut fuerunt , aut futuræ sunt , aut possunt esse . At vero ex tribus propositionis septimæ corollariis patet existere hoc ens a se , independens , & necessarium , in quo omnia , quæcumque sunt , aut fuerunt , aut debent , & possunt esse existentiae suæ sufficientem rationem habeant . Itaque existit Deus .

Corollarium .

ET quia ens illud , de quo in iisdem corollariis , erat ex genere incorporearum , & spiritualium rerum , Deus , quoque incorporeus erit , & spiritualis .

PROPOSITIO NONA .

DEus est simplicissimus .

Demonstratio .

DEus est incorporeus , & spiritualis ,
ut mox fuit dictum . Non itaque
ex ullis partibus componi potest , sive est
in se simplicissimus .

Corollarium .

OMnes Dei proprietates sunt una , at-
que simplicissima Dei essentia . Ne-
que enim ulla proprietatum distinctio , &
compositio in ente incomposito , & sim-
plicissimo potest concipi .

PROPOSITIO DECIMA .

DEus est immutabilis .

Demonstratio .

DEus per octavam propositionem ab
exteriori principio aliquo non pen-
det . Itaque extrinsecus est immutabilis .
In se , & intrinsecus est necessarius . At
quod est necessarium est immutabile .
Non itaque ad extra solum , sed ad in-

tra etiam immutabilis est Deus .

Corollarium .

QUæ mutabilia , & contingentia extra Deum reperiuntur entia , nec necessario a Dei substantia emanant , nec essentialiter ipsi conjuncta sunt .

PROPOSITIO UNDECIMA .

DEus est æternus , & immortalis .

Demonstratio .

INCIPERE est transitum a non existentia ad existentiam facere : DESINERE est transitum facere ab existentia ad non existentiam . Utrumque vero est mutari : Et Deus ex superiori propositione decima est immutabilis . Neque igitur aliquando incœpit , neque aliquando potest desinere , sive est æternus , & immortalis .

Corollarium .

ET quia quidquid est Deus necessario est , nec potuit , nec potest esse ,

aut non æternus , aut non immortalis :

PROPOSITIO DUODECIMA .

Deus est omne id , quod potest in se ipso esse .

Demonstratio .

Quidquid non est omne illud , quod potest esse , potest plus esse , quam modo est , & quod plus potest esse potest mutari . Deus vero est immutabilis . Ergo plus esse nequit , quam modo est , sive est in se illud omne , quod potest esse .

Corollarium Primum .

ID , quod maiorem suæ existentiae extensionem habet , seu plures , præstantioresque affectiones in se complectitur , ex quinta definitione perfectius est . Itaque Deus , qui eas omnes habet , quas potest habere , est perfectissimus .

Corollarium Secundum .

ET quaecumque peculiaris perfectio excogitari a nobis possit , sapientia , bonitas , justitia &c. , ea in sua omni possibili extensione in Deo erit , sive erit Deus sapientissimus , optimus , justissimus &c.

PROPOSITIO DECIMA TERTIA .

Deus est in se beatissimus .

Demonstratio .

Illud in se beatissimum debet dici , quod in se habet quidquid beatitudini propriae ulla ratione potest conducere . Sed , per duodecimam propositionem , Deus in se habet quidquid in se ipso habere potest . Habet ergo in se quidquid potest beatitudinem suam aut constituere , aut augere . Ergo est beatissimus .

Corollarium .

DEus , ut sit beatissimus non indiget rebus aliis quibuscumque extra se positis .

PROPOSITIO DECIMA QUARTA.

DEus est infinitus .

Demonstratio .

QUod non est infinitum finem habet , & quod habet finem potest esse amplius quam est . Sed per duodecimam propositionem non potest Deus esse amplius , quem est . Est igitur infinitus .

Corollarium .

ET qua quidquid metitur habet finem , Deus , qui est sine fine , erit etiam sine mensura , hoc est immensus .

PROPOSITIO DECIMA QUINTA.

DEus est unicus .

Demonstratio .

PER corollaria primum, atque alterum propositionis duodecimæ, Deus in se habet perfectiones omnes possibiles. At perfectiones omnes possibiles in pluribus simul entibus complecti absurdum est: Quum necessario deficere debeant alteri alterius perfectiones. Deus igitur, qui omnes in se complectitur, erit unicus.

Corollarium .

A Fortiori neque duo Dii esse poterunt, quorum unus sit bonus, & beneficus, atque alter malus.

PROPOSITIO DECIMA SEXTA.

DEus est omniscius.

Demonstratio .

DEus in se comprehendit sufficientem rationem omnium corporearum, est spiritualium rerum, quæ sunt: Et

quo pacto earum rerum, quæ modo sunt, sufficientes rationes Deus in se comprehendit, comprehendere etiam debet rationes earum omnium, quæ fuerunt, aut erunt, aut possunt esse. Colligitur id ex septima, & ex octava propositione. Itaque Deus in se comprehendit rationes omnium, & singularum rerum, siue est omniscius.

Corollarium Primum.

Scientia Dei in Deo est, neque ex rebus extra Deum positis hauritur.

Corollarium Secundum.

Scientia Dei immutabilis est, qua ratione immutabilis est Deus ipse.

Corollarium Tertium.

Scientia Dei nihil est aliud quam ipsa ratio existentiae, & possibilitatis intrinsecæ rerum omnium.

PROPOSITIO DECIMA SEPTIMA.

Deus simul, & eodem tempore videt omnia.

Demonstratio.

Scit enim Deus, & cognoscit omnia in se ipso, sicuti in corollario primo decimæ sextæ propositionis fuit dictum. At vero, ut constat ex corollario propositionis nonæ, in Deo non potest esse distinctio ulla partium, & proprietatum. Cognoscit igitur, & videt omnia eodem tempore, & simul.

Corollarium.

Omnia Deo præsentia sunt citra ullam, aut futuri, aut præteriti diversitatem.

PROPOSITIO DECIMA OCTAVA.

Deus extra se libere agit.

Demonstratio .

DEus ad agendum potius hoc , quam illud determinari extrinsecus non potest . A nullo quippe exteriori principio pendet . At neque intrinsecus , & ex necessitate naturæ suæ determinari potest ad hoc potius , quam illud extra se agendum : Secus res exteriores suæ ipsi essentiae connexæ essent , contra propositionis decimæ corollarium . Ergo neque a se , neque ab alio ad agendum extra se cogitur : Extra se ergo est liber .

Corollarium .

QUoniam quidquid in Deo est immutabile , & perfectissimum esse debet , perfectissima simul , & immutabilis erit hæc libera Dei voluntas .

PROPOSITIO DECIMA NONA.

DEus est providentissimus .

Demonstratio .

PROvidentia est earum rerum , quæ sunt , aut futuræ sunt , præscientia , dispositio , & gubernatio . Deus vero perfectissime regit quæcumque sunt , & quæ aliquando erunt prospiciens , perfectissime , & ad arbitrium disponit , per octavam , duodecimam , decimam sextam , & decimam octavam propositionem . Est ergo providentissimus .

Corollarium .

DEus omnia ad peculiare suos fines dirigit .

PROPOSITIO VIGESIMA .

DEus est omnipotens .

Demonstratio .

PER propositionem octavam Deus in se ipso habet sufficientem rationem earum omnium rerum , quæ sunt , aut fuerunt , aut debent , aut possunt esse .

Potest itaque id omne facere , quod potest fieri , & esse ; id quod & esse omnipotens .

Corollarium Primum .

DEus infinite plura , & majora potest efficere , quam nos possimus intellectu nostro comprehendere .

Corollarium Secundum .

INcomprehensibilitas rei cujuscumque non est sufficiens argumentum , quo tamquam falsa , & impossibilis rejiciatur .

PROPOSITIO VIGESIMA PRIMA.

DEus non potest facere id , quod involvit contradictionem .

Demonstratio .

QUod non habet in Deo rationem aliquam sufficientem , cur sit , neque ab ipso Deo potest effici : Secus sine ratione sufficienti esset . At quod involvit contradictionem habere in Deo sufficientem rationem propriæ existentiae ne-

quaquam potest : Secus non amplius esset contradictorium . A Deo itaque non potest effici .

Corollarium .

Quia vero Deus est omnipotens , non defectus , sed complementum verius , & perfectio potentiae erit non posse , quae ex se pugnantia , atque ideo imperfecta sunt .

PROPOSITIO VIGESIMA SECUNDA.

Non potest Deus producere aliquod ens perfectissimum .

Demonstratio .

Ens perfectissimum esset immensum , & infinitum , ac necessarium , sive a se . Itaque , si a Deo produci posset , posset produci ens aliquod , quod a Deo esset , & non a Deo , scilicet a se . At esse , & non esse a Deo involvit contradictionem , ut planum est , & quod involvit contradictionem a Deo non potest effici , ut dictum fuit in vigesima prima
pro-

propositione . Non ergo potest ens perfectissimum a Deo produci .

Corollarium Primum .

Non potest Deus facere quod creaturæ sint prorsus indefectibiles .

Corollarium Secundum .

Deus mala omnia in creaturis suis impedire nequaquam potest .

PROPOSITIO VIGESIMA TERTIA .

Non potest Deus rerum essentias immutare .

Demonstratio .

Essentia est quod rem aliquam talem intrinsece constituit . Si ergo posset mutari essentia , posset effici quod res eadem esset simul , & non esset talis . Esset nimirum ex facta hypothese , quod sit : Non esset ob propriæ essentiæ defectum , mutationemque . At id involvit contradictionem . Non potest ergo a Deo effici .

Corollarium .

NEque ergo poterit Deus producere corpus , quod non sit iners , quodque ex se aliquod principium actionis habeat .

PROPOSITIO VIGESIMA QUARTA.

Non potest Deus efficere ut corpus cogitet .

Demonstratio .

COgitare est rerum ideas in se producere , separare , conjungere , alias ex aliis derivare , revocare jam habitas &c. Cogitatio itaque ex suo formali conceptu involvit agendi principium aliquod. Haberent itaque actionis principium aliquod corpora si cogitarent : Id quod respectu etiam divinæ omnipotentiae esse impossibile dictum fuit .

Corollarium .

Pari modo ostendetur non posse Deum creare corpora , quæ ex se , & præ-

scindendo ab exteriori actione quavis ,
moveantur , seu , quod eodem recidit ,
Deum esse motuum eorum omnium , qui
in hoc Universo fiunt , immediatam effe-
ctricem causam .

PROPOSITIO DECIMA QUINTA.

Quod est in nobis volendi , intelligen-
dique principium spirituale , & in-
corporeum esse debet .

Demonstratio .

EX vigesima quarta propositione id ,
quod cogitat , materiale , & corpo-
reum esse nequit . Anima ergo , quæ in
nobis cogitat , & intelligit , est spiritualis,
& incorporea .

Corollarium Primum .

Quia , quod non est corporeum , non
habet partes , anima ex partibus com-
poni , & resolvi in partes , ac per
eamdem resolutionem partium interire
nequaquam poterit . Erit igitur ex sua
natura immortalis .

Corollarium Secundum.

Etenim quia quod non habet partes, nec est extensum, nullibi est, nullibi etiam in nostro corpore, tamquam per loci occupationem esse poterit anima, & ridiculum prorsus erit inquirere, utrum in glandula pineali, & cerebro, vel cerebello, aut in medulla oblongata sit.

Corollarium Tertium.

Aderit ergo corpori nostro anima assistendo, & regendo tantum, non vero ullum locum in corpore occupando.

Scholium Generale.

Corollaris primo, & secundo propositionis vigesimæ præoccupavimus, atque exsolvimus verbo difficultates omnes, quas Athei contra Dei existentiam, immaterialitatem, & providentiam solent opponere quasque perstringit veluti Bælius in Dictionario Historico, & Critico, titulo Simonides. Hujusmodi sunt, quod

non possit a nobis concipi, quomodo existat aliquid, quod nulla spatii portione commensuretur; quomodo, quum Deus ob spiritualitatem suam sit nullibi, ob suam immensitatem sit ubique; quum sit necessarius, & immutabilis, sit etiam liber; quumque sit sapientissimus, & providentissimus mundi hujus administrator tot malos homines prospere agere, & tot affligi bonos permittat. Ecquid enim etiam si hæc omnia quomodo sint non possit a nobis percipi? Anne propterea dubitandum erit quod sint, maxime si naturalis, & recta ostendat ratio ea, quomodo percipi a nobis nequeunt, vere esse? Minime gentium: Nam quoniam longe plura in Deo esse, & a Deo posse fieri, quæ nos non possumus intellectu nostro comprehendere, ex ipsa Dei infinitate, & omnipotentia plane sequitur, incomprehensibilitas rei cujuspiam non erit tutum, & sufficiens argumentum, quo debeat negari, & rejici.

Id in humanis quoque, & naturalibus rebus, quarum quum plures esse

certo sciamus, quo tamen modo fiat non percipimus, locum omnino habere fufius, & erudite in *Conversione Comitis Rochæ* ostendit Episcopus Salisburienfis. Id aliis exemplis pariter possemus nos confirmare, nisi pigeret jam in detrito, pervulgatoque argumento diutius immorari. E re igitur magis erit, quod, cum superius ordinata attributorum, perfectionumque Dei inquisitio eo pedetentim nos duxerit, ut materiam, cogitationemque, ne per divinam quidem omnipotentiam, misceri inter se posse ostenderemus, in celeberrima nostræ hujus ætatis controversia paullisper sistamus nos, & rationes singulas illas examinemus, quibus incertum Joannes Lockius, ac dubium voluit relinquere, utrum materia, per divinam saltem omnipotentiam cogitationis participes possit fieri, nec ne. Id vero breviter, quantum speciminis hujus institutum exigit, & libentissime etiam præstabimus, quoniam, Genuensi, & Poliniaco excepto, cæteri, qui postremis hisce annis fufius, atque ex professo adversus Lockium

de immaterialitate animæ scriptitarunt, ii nobis videntur tantum, aut argumenta Sullingfleetii recoxisse, aut exprobasse nonnullas Lockio contraditiunculas, quod non adeo erat difficile, aut de suo quasdam argutias addidisse, quas plane nescio utrum alicui jugi Philolopho satisfecerint.

Lockius igitur de intellectu hominis agens libro quarto, capite tertio, quod de extensione cognitionis humanæ inscribitur, generale theorema statuit, quascumque nostras cognitiones ideis esse limitatiores. Cognitio quippe, ut definit capite primo ejusdem libri, est perceptio aut convenientiæ, aut disconvenientiæ idearum, & habetur præcise quatenus hæc a nobis, aut convenientia, aut disconvenientia percipitur. Id autem triplici modo fieri capite secundo explicat. Primo intuitione duas ideas immediate sibi invicem comparando. Secundo ratione idearum duarum disconvenientiam, aut convenientiam tertiæ alicujus ideæ interven-
tu examinando, quæ binas illas aut separet, aut conjungat. Tertio sensatione.

particularium rerum existentiam attingendo . Jam vero , sequitur capite tertio ipse Lockius , si intuitione comparata sit ea cognitio , cum sola , & simplici duarum idearum comparatione relationes earundem omnes non innotescant , ad ideas omnes , quæ intuitiva est , cognitio non extendetur . Quod si ratione acquisita sit , quia non semper in promptu est tertia idea , quæ duas propositas , aut necat , aut disjungat , de iis omnibus demonstrativa cognitio haberi nequaquam poterit , de quibus habentur ideæ . Quod si sensatione demum sit parata , ultra existentiam earum rerum non extendetur , quæ sensus nostros immediate possunt afficere . Atque ita cognitiones sensitivæ erunt præ intuitivis semper , ac demonstrativis limitationes . Ex quo humanas cognitiones omnes esse ideis magis restrictas , neque ad ea omnia extendi , ad quæ extenduntur ideæ , universim deducit Lockius , qui antea perceptionem ab idea minime distinguens , ideæ vocabulo appellavit (a) ,

tout

tout ce que l'Esprit appercevoit en lui même, toute perception qui est dans notre esprit lors qu'il pense. Si cognitio definiatur duarum vel plurium perceptionum conjunctio, vel separatio, & ideæ nomine, non jam quælibet mentis perceptio intelligatur, sed tantum repræsentatio, sive imago rei menti exhibita, sicuti Arnaldus (a), Genuensis (b), Wolfius (c), & alii passim perspicacissimi Metaphysici intelligunt, fallum erit Lockii theorema. Hoc enim in sensu accepto ideæ vocabulo planum est nullam Dei, & spirituum ideam in nobis esse, quamvis & spiritus, & Deum existeret apertissime cognoscamus. Sic tantum aberit, quod cognitiones ideis sint restrictiores, ut potius de iis etiam rebus cognitio haberi possit, de quibus ideæ non habentur.

Sed amplius Lockio non disputemus veritatem theorematis, &, quoniam sic ipsi placet, perceptiones synonymas ideis

d 4

fa-

(a) *Introd. in Logicam.*

(b) *Par. 2. def. 4. in scholio.*

(c) *Psyc. Emp. par. 1. sect 2. cap. 1. § 48.*

faciamus . Videamus quid inde sequitur .
*Après tout cela , subdit Lockius , je crois
 pouvoir dire hardiment , sans faire tort à
 la perfection humaine , que notre connois-
 sance ne sauroit jamais embrasser tout ce
 que nous pouvons desirer de connoître tou-
 chant les idées que nous avons , ni lever
 toutes les difficultez , & résoudre toutes les
 questions , qu'on peut faire sur aucune de
 ces idées . Par exemple , nous avons des
 idées d'un Quarré , d'un Cercle , & de ce
 qu'emporte égalité ; cependant nous ne se-
 rons , peut-être , jamais capables de trou-
 ver un Cercle égal à un Quarré , & de
 savoir certainement s'il y en a . Nous avons
 des idées de la Matière , & de la Pensée ;
 mais , peut-être , ne serons-nous jamais
 capables de connoître si un Etre purement
 materiel pense , ou non . At vero aliud
 omnino est , quod non semper ad illas res
 extendatur cognitio nostra , ad quas ex-
 tenduntur ideæ , aliud quod numquam
 extendi eouque possit . Primum etiam si
 Lockio concedamus non sequitur etiam
 alterum verum esse : Plane enim in nobis*

plures cognitiones esse de iis ipsis rebus , de quibus habentur ideæ , ita est certum , ut etiam pudeat exemplis veritatem manifestissimam confirmare . Aliqua tamen in medium proferamus . Habemus ideam quadrati , ideam segmenti parabolici , & ideam ejus , quod indicatur vocabulo æqualitatis , & scimus insuper quadratum esse segmento parabolico æquale : Habemus ideam circuli , & ideam quadrati circulo inscripti , vel circumscripti , & scimus circulum non esse inscripto , circumscriptove quadrato æqualem . Itaque nimis festinanter Lockius ex eo theoremate , quod cognitiones universim sumptæ sint ideis nostris limitatiores ad cognitiones peculiare veniens deduxit cognoscimur a nobis posse utrum materies cogitationis particeps fieri unquam possit , nec ne . Quod si addamus postmodum ideæ corporis ideam inertię necessario connexam esse , componi vero , & necesse inter se non posse ideas inertię , & cogitationis , res omnis confecta erit , & corpus cogitans erit omnino impossibile .

Neque vero est quod ad tenebras ignorantiae nostrae confugiat Lockius, & ex quo plura alia non cognoscamus, inferat nec posse a nobis cognosci utrum cogitare aliquando possit, aut non possit materies. Severiori Philosopho prorsus indigna hæc mihi argumentandi ratio solet videri, &, quantum ovum ovo esse potest, alteri illi similis, qua, ex quo circulus rectificari, & quadrari nequeat, inferret quispiam, nec parabolam Apollonianam quadrari posse, nec quam vocant Nælianam, & cubicam, rectificari. Sed tamen audiamus Lockium. Ait nobis imperceptibile, & incompertum æque esse quomodo materia cogitet, quam quomodo existant spiritus, & spiritus conjungantur materiæ, & materia agat in spiritum, & viceversa: Sed existere spiritus aliunde novimus, & corporibus uniri, & agere in corpora, & viceversa; incomprehensibilitas igitur cogitantis materiæ minime officiet ipsius possibilitati, aut existentiae. Hoc capite eodem tertio argumentum proposuit, & postmodum,

occasione disputationis in Anglia exortæ ,
 Doctori Stillingfleetio rursus objecit . Sed
 argumenti major neganda est : Neque
 enim non percipimus tantum quam ra-
 tione cogitare possit materies , quemad-
 modum non percipimus quam ratione
 agere in spiritum materies possit, sed ma-
 nifestam , evidentemque contradictionem
 deprehendimus , inertem inter substan-
 tiam , ut est materies , & inter vim , fa-
 cultatemque cogitandi . Itaque dispar est
 casus cogitantis materiæ, & materiæ agen-
 tis in spiritum .

Quæ Lockius addidit leviora sunt .
 Nam quod ait affectiones varias superad-
 di a Deo materiæ posse , quin destruat
 materiæ essentia , vegetationem , motum
 &c., utique verum est quamdiu intelliga-
 tur motuum , & virium causam exterior-
 rem esse corporibus , & corpora in hisce
 motibus passive tantum se habere , quate-
 nus scilicet , quum ex se inertia , & indi-
 ferentia sint ad hunc potius , quam illum
 locum occupandum , possunt ab exteriori
 principio aliquo de loco in locum trans-
 ferri ;

ferri : Ad hoc vero ut materies cogitet active se habere debet , debet producere rerum ideas , separare , conjungere , alias ex aliis derivare &c. , id quod inertiam materiæ tollit , ac destruit . Quod deinde subdit Deum posse substantiam aliquam materialem creare in statu perfectæ inactivitatis , quæ nullam proprietatem respuat , aut exigat , & cui propterea cogitatio adjungi possit , debet negari : Debet quippe ea substantia , in facta hypothesi , quod sit , contrarias essentiæ suæ proprietates , actionem quamlibet , cogitationemque ex se respuere . Quod tertio congerit Deum posse materialem substantiam a ratione materiæ separare , in substantiam immaterialem convertere , donare , vi cogitandi , & non ablata cogitatione huic substantiæ per suam omnipotentiam restituere eidem posse , quod demerat , rationem scilicet ipsam materiæ , id inquam claudicat undique , cum falsum sit ablata materiæ ratione substantiam materialem converti in immaterialem , atque immaterialem , & cogitantem substantiam

salva cogitandi vi , & facultate posse in-
 materialem converti . Ad minimum id
 erat illud , quod probandum Lockio in-
 cumbebat , quodque tot argumentis ducti
 nos inficiamur .

Quæ ex brutis eruitur difficultas, ne-
 scio cur tanta apparuerit Domino De
 Voltaire . Aut enim sunt pura automata ,
 aut si vere intelligunt, cogitant, & volunt
 bruta alia ipsis substantia immaterialis est
 adjicienda . At imponamus demum dis-
 sertatiunculæ toti finem , & quæ hæcenus
 dicta sunt perstringentes , adjicientesque
 alia his analogæ , eo exponamus modo ,
 quo plenior contradicendi , & dicendi co-
 pia in Philosophica concertatione fiat .

CONCLUSIONES

LOGICO-METAPHYSICÆ .

I.

Naturali ratione adversus Atheos
 ostendi potest Deum existere .

I I.

Eadem contra Gentiles demonstra-
tur Deum esse unicum.

I I I.

Et adversus materialistas Deum ma-
terialem esse non posse evincitur.

I V.

Deus est omnipotens, ita tamen
ut, quæ absurda, impossibilia, & con-
tradictoria vere sunt, efficere nequa-
quam possit.

V.

Neque potest prima, & generalia
principia falsa reddere: Unde, quæ
scientia Metaphysica dicitur, apud nos
datur.

V I.

Cum ergo contradictionem aperte
involvat materiam cogitare, neque ab
ipso Deo omnipotenti fieri poterit, quod
cogitet.

VII.

Insulsa porro , atque infirma videntur nobis ea omnia Lockii argumenta , quibus ipse dubium , ac tenebras in perspicuo theoremate voluit offundere .

VIII.

Præter Deum Angelos etiam bonos, malosque existere ex fide certum supponimus .

IX.

Angelorum malorum potestatem in corpora ex naturali ratione investigantes, statuimus non posse eos ad nocturnum , ut vocitant , congressum transferre Lamiâs , nisi plura alia occurrant simul Phœnomena , quæ cum minime habeantur , congressus ipse commentitius merito censeri debet .

X.

Alia insuper vanitatis hujus congressus indicia sunt ; potissimum quod quæ

Lamiæ ad congressum transferri sese jactabant , eo iplo tempore , quantum observari hæcenus potuit , minime ex propriis cubiculis sunt egressæ .

X I.

Nitimur vero explicare aliquo modo hos omnes Lamiarum visus , & ex sola imaginationis vi derivare .

X I I.

Supponimus etiam ex sacris litteris , & ex veteri testamento satis constare Magos , & Maleficos homines ante Christi Domini adventum vere exitisse .

X I I I.

Tum ejusdem Scripturæ , & Sanctorum Patrum autoritate freti negamus exitisse eos post Christi adventum .

X I V.

Ex tot iis Magicarum artium prodigiis , quæ passim narrari solent , alia mere naturalia esse volumus , alia prorsus ima-

ginaria , alia tantum supposita :

X V.

Immerito autem hacce in re nobis imponunt cum Martino Del Rio alii Magicarum artium assertores , dum integræ antiquitatis consensum nobis contrarium esse obijciunt .

X V I.

A Deo , & ab Angelis ad animam convertentes orationem nostram statui-
mus , quod , quamdiu corpori conjuncta est , sensibus tuto uti potest ad veritatem intelligendam .

X V I I.

Id vere in iis rebus dumtaxat valere volumus , quæ sensibus immediate subje-
ctæ sunt : In reliquis optima veritatis re-
gula , & criterium est idea clara , & di-
stincta .

X V I I I.

Idea Dei , prout est in nobis , facile

admodum ex rerum sensibillium contem-
platione assequi , & hauriri potest .

X I X.

Unde immerito statuit Cartesius eam
esse ingenitam .

X X.

A fortiori neque aliæ nobis substan-
tiæ , corporis , veritatis , bonitatis , per-
fectionis &c. ideæ , a prima creatione in-
ditæ , & impressæ sunt .

X X I.

Ostendimus porro quam ratione
omnes ex sola mentis reflexione , & sen-
sibillium rerum aspectu habeantur .

X X I I.

At neque aliæ ideæ practicæ , & pri-
ma moralia principia esse ingenita cum
Cl. Herbertio dici potest .

X X I I I.

Non excitantur in nobis ideæ per

conversionem ad Phantasmata , ut olim Peripatetici ludrice magis quam vere contendebant .

XXIV.

Nulla pariter est Dei, & animæ physica, & naturalis conjunctio, ex qua cum P. Malebranchio deduci possit nos omnia intelligere per solam conversionem ad Deum .

XXV.

Alia insuper sunt, quæ subtilissimi Metaphysici hypothesim absurdam faciunt, & impossibilem .

XXVI.

Excuduntur itaque ab anima singulæ ideæ propria, & ingenita a Deo vi, neque sunt aliud nisi modi ab eadem anima realiter non distincti .

XXXVII.

Et aliæ quidem, ut optime adnotavit Lockius, per reflexionem mentis ad

se ipsam , aliæ occasione sensationum , & sensibilium rerum excuduntur .

XXVIII.

Sensationes inchoantur utique , non vero absolvuntur penitus in externis partibus nostri corporis .

XXIX.

Sed habentur exinde tantum , quod extimæ nervorum partes ab objectis sensibilibus percellantur , immutenturque , tum hæc ipsa immutatio spirituum animalium ope ad communem nervorum originem deferatur .

XXX.

Quod cum per solum spirituum eorundem motum præstari possit , nulla est necessitas , quod ullòs nervorum tremores cum Argenterio ad sensationes explicandas comminiscamur .

69

I M P R I M A T U R

Die 18. Maji 1754.

F. Jo. Christ. Gerosa O. P. S. Th. Prof., nec
non S. Off. Mediol. apud Rosam Pro-Com-
miss.

J. A. Vismara pro Emin., & Rev. D. D.
Card. Archiepiscopo.

Vidit Julius Caesar Bersanus pro Excell. Se-
natu.

339.18
2



BIBLOS
Firenze



